

CHINESE-JAPANESE
HARVARD-YENCHI
AT HARVARD UNIVERSITY

13

MAY 11 1951

ET 9117 71142 (13)

渡邊家文庫			
漢書	集類	四七七〇號	二四冊
淡	函	架	四

嘗論中山公子年身在江海之上心居魏闕之下
所謂少陵一飯不忘者也而狄懷英登太行反顧
見白雲孤飛謂左右曰吾親舍其下瞻悵久之雲
移乃得去則又四牡詩人豈不懷歸之旨若是乎
異趨殊情不可同年而語而不知君父之慕忠孝
之忱其致一也新城先生蠶尾集二卷自敘以為
康熙甲子冬奉朝命往祀南海過東平遙望數
羸隱見於烟波滅沒中迫王程不得淫用取名此
集以寓其夢想之思論者謂先生泊於宦途聲利
不撓於念匪獨浮湛外寮時勝踐名區翛然孤寄

哈佛大學漢和
圖書館珍藏印

渡邊千春遺愛書

即當荷特知膺榮遇敷歷彤庭青瑣之班而謝公
寢處自有山澤間儀元規之風範獨存丘壑也集
名蠶尾殆與漁洋諸集命名略同商丘宋公因以
黃魯直自號山谷涪翁為比不可謂非知先生者
而猶不盡此也竊考先生使粵還朝念封公祭酒
府君年垂暮乞假遄歸乃請急之日即封公捐館
之辰相距止十日不及見終天之痛逾深摩抄手
澤號泣松楸新阡寫哀一篇淒其欲絕瞻雲之歎
百倍懷英由是故園松梓將有終焉之志茹紫芝
於商顏薦春蔬於鄉國其見於先後懷人之什家

評之章往隄三致意焉第以

主眷便蕃難遂初服服既闋旋赴闕廷未幾南

臺執法西樞握兵公望公才益與經國之文章聲
名並峻身在魏闕正不敢以心居江海任達鳴高
夫子述卿士大夫之行曰夙夜匪懈以事一人又
曰夙興夜寐無忝爾所生如先生者不亦忠孝兼
備而君父交致其誠也哉然則先生之詩謂之四
牡懷歸之詩可也謂之少陵一飯不忘之詩亦可
也余故舉名集之義而推原其說俾後之學者油
然有所興感焉程哲拜識壬辰元巳日

三子子
往祀南海過東平會大雪連日夜遙望湖中天水
相際有數羸隱現於煙靄滅沒之間者土人指似
曰此蠶尾山也時風雪寒冱又迫王程不得往既
南行數千里猶時時夢見之昔韓退之嘗作鄆州
溪堂詩盛稱其蒲蓮蒹葦芡龜魚之產予卒卒
未暇問溪堂所在度其勝未必及此湖而源明之
歌詩直駕退之而上予稱鄆之山水獨在此不在
彼蓋亦未可以爲過也予家濟南所居在長白之
麓錦秋湖之陰距鄆五百里予方備員於朝即
舊隱數椽未能退而偃息乎其間豈暇謀及數百

里之外私其名勝使爲吾有哉亦聊以寄吾懷焉
而已偶次甲子使粵以前及丁卯以後詩庚午以
後雜文稍成卷帙遂以蠶尾名集而又書其命名
之意以喻吾懷焉漁洋山人王士禛序

子瞻學李杜尤學退之而究非李杜亦非退之
 也李杜之作漢魏以來詩人之總萃得乎風雅之
 傳之正者昌黎則加恢奇焉排界焉而一變矣至
 子瞻則加瞻博焉整比焉以恣行其奇界者而又

原序

古今詩人莫不以李杜為絕詣矣李杜而外無有
 相雄峙者乎曰曷為而無也退之子瞻後李杜而
 詣其極者也然則退之子瞻襲李杜為之乎曰前
 乎有李杜焉後乎復一李一杜則不得為絕詣矣
 李之與杜固不相襲者也退之學李杜而非李杜
 也子瞻學李杜尤學退之而究非李杜亦非退之
 也李杜之作漢魏以來詩人之總萃得乎風雅之
 傳之正者昌黎則加恢奇焉排界焉而一變矣至
 子瞻則加瞻博焉整比焉以恣行其奇界者而又

一變矣然其歸要于禮義其用使人各得其情性則亦猶之正而已矣此四君子之所以各詣其極而更數百年以來未有起而配之者也然如有起而配之者將爲李爲杜爲退之子瞻以肖其形模乎抑又有別異于四君子者也我師新城王先生以詩名海內者四十年自縉紳先生下至縫掖士言詩者必歸之先生聞焉而慕見焉而悅自度其力之必不能至焉而服爭相趨而師尊之極一世之宗工秀人無異詞或以爲太白子美或以爲退之子瞻固皆擬之而得其倫矣然而先生實不爲

李爲杜爲退之子瞻者其澄淡簡遠者得之二謝淵明王孟韋柳其舒和高暢者得之何劉鮑照沈宋王昌齡李頎錢起之徒其抑揚適壯得之子建公幹子昂達夫常建杜牧之諸人其風容色澤亦間而爲徐庾溫李而時時出其力與太白子美退之子瞻馳騁角逐則不見其毫釐分寸之不迨焉至由四君子而下數之如放翁石湖趙閑閑元遺山高季迪李西崖世皆號爲詩人之宗者以視先生抑亦莫之及也學者以先生追配太白子美退之子瞻固有不相同而相雄峙者乎夫歷唐宋以

三十九
三子九十九
來千有餘年之間止此四君子挾輶而起而他皆
不得而頡頏焉何造物者之生才若是其難也然
以四君子之魁壘傑出各極其才之所造而不可
齊以一致先生起而配之更有以自別于其間何
造物者之生才又若是其奇也然後知豪傑之士
能自拔于千古者雖極其所傾心而學之之人未
有肯一襲其陳迹而爲之者也先生漁洋前後集
及蜀道南海集之刻學者幾于家有其書矣復次
其乙丑以來之詩爲二卷謂之蠶尾集先生曰我
少壯時歲得詩不下三百首今十年之中而所作

止是子其爲我序之雲章嘗見向之爲詩者人盡
曰我師盛唐而規摹聲響汨喪性靈已甚自有先
生之詩唐人之真面目乃出而又上推漢魏下究極
于宋元明以博其旨趣而發其固蔽以迄于今海
內才人輩出則又往往自放于矩矱以張皇譎詭
爲工滔滔而莫之反先生近年遂多爲淡泊之音
以禁其囂囂無益者雖向之所作極其意所欲言
未嘗一語有溢于情性禮義而今尤範以性情禮
義之正使之自唐而溯之以不遠于風雅之傳亦
猶之窮河源者必返之崑崙星宿沂江流者必返

三子字二
蠶尾言集序
三
之沃焦羊膊此則先生茲集之微意歟雲章不敏
所謂不造其堂不躋其闕者然以太學弟子從先
生遊有年矣前之所言乃天下所共見于先生非
自雲章發之也後之所言則先生以詩立教之旨
而是集之刻尤願與世之同志潛思而知本也哉
其曰蠶尾集取之東平之山在小洞庭河中者唐
蘇源明宴遊詩序有左拂蠶尾之言而先生詩亦
有云積雪明蠶尾浮雲下洞庭者可以想見其處
云嘉定門生張雲章謹序

帶經堂集目錄

第四編

蠶尾詩集

卷一

古今體詩一百八首

卷二

古今體詩一百十一首

先生詩皆系年此集獨異按自序云偶次
甲子使粵以前及丁卯以後詩文稍成卷
帙為蠶尾集甲子冬及乙丑年所作別為
南海集已編入續集中故此集另為一編
今悉仍先生手定第敘次某卷詩若干首

不復以年系云哲識

南齊書已歸人齋集中姑此集是也

甲子對粵以前及下地必對言文辭效卷

夫土前習系平北集國異對自我云

古今對言一百十一首

卷二

古今對言一百八首

卷一

帶經堂集目錄

卷一

帶經堂集卷五十三

歙門人程哲校編

新城王士禛貽上

蟹尾詩一

送湯荆峴學士改中丞巡撫江南

論文六載西清直公望公才衆不如節鉞忽承

天子命經綸正賴古人書帆檣萬斛勞掇粟水旱

三吳急賜租會見飛章達民瘼何須鄉夢戀樵漁

過丁香院訪張杞園不遇題壁

吟遶長廊取次行主人不見綠苔生蜂聲滿院日

卓午花氣撲簾春晝晴

題景州閩遊詩卷

獨持懷古意去謁武夷君九曲無人到千峰盡白
雲鴻飛天外遠鸞嘯月中聞一與曾孫別人間又
夕曛

為門人朱悔人題王叔楚畫竹卷二首

小竹山人寫叢竹渭川千畝起毫端愛渠低亞清
溪水幾個橫斜拂釣竿

茅齋青壁幾年成溪路無人略約橫一夜春雷動
崖谷四山風雨箨龍驚

甲子暮春邀修來幼華升六千仞伸符天章

悔人過聖果寺看桃花二絕句

古寺尋春已後期東風猶為絳桃遲禪扉靜掩殘
春雨細逐茶煙鬢鬢絲

章華宮裏細腰身移入招提又幾春一樹天斜忒
無賴也須著莫白頭人

題門人汪舟次乘風破浪圖四首

海外真看大九州青天一髮是琉球人間竒觀君
知否萬里滄溟萬斛舟
扶桑東望海天孤虎節龍章擁萬夫正是水犀酣
戰日樓船十道下彭湖

百靈不散石郵閑親見神魚跋浪間青史他年詫
竒事天風三日到中山
竹冊親頒異姓王歸來封事動明光儘教乞與丹
青手寫作靈槎著日傍

將乞假歸省批家書尾示兒凍

樗散無能合乞身歸來不擬負青春池東添箇垂
楊樹要看飛花點白蘋

訪賓公大谷山居

春原麥爭秀斜日雉交飛礪水寒猶淺村煙望不
稀田家驅犢返仄徑負樵歸想見南牕下看山杜

德機

柳菴同賓公寶菴作

西巖古寺隱谿行飯從容到日斜最愛過橋垂
柳樹一溪新水照藤花

題張賓公采芝山堂

童穉相看有鬢華杖藜隔歲訪山家野風吹斷碧
谿水林鳥啄殘紅杏花田舍初開缸面酒江船將
到雨前茶卜鄰未果平生約慙愧東陵學種瓜

長白雜詩八首同賓公作

書堂道中

山勢圍黃鵠書堂望處孤行騰逐禪侶荷蓀問樵
夫鳥道捫參井人煙倏有無入雲鐘梵近失喜一
相呼

書堂

香界諸天外心知開士家雙林圍石壁十丈落藤
花薺樹環平野浮嵐到海涯希文留古井先試趙
州茶

石梁

窈窕度魚梁縈紆一水長臨流多白石列坐復垂
楊歷歷禽魚影蕭蕭蘭杜芳鷄鳴在何處小塢出

松篁

葛家洞

長嘯發孤煙一聲高柳蟬山風吹斷續水石苔潺
湲魚鳥真濠濮雲林亦市廛都籃碧溪側隨意煮

清泉

嘯旨有
高柳蟬

柳菴

溪行路不極溪上出香林一夜前山雨千迴石瀨
深空花春漠漠仙梵午沈沈舊識梅檀味還能悅
衆心

柳菴西方丈夜坐

踏閣攀林罷閑階坐夜分木犀春半發鼻觀定中
聞舉首見明月西峰歸片雲徘徊戀清景谿籟遠
紛紛

黛溪

策杖尋源去靈溪一徑穿湍飛時激石花閉屢通
泉初日光斜照文魚影倒懸他年皈白社終倚黛
溪偏

于茲仙人祠

我愛寒山好招尋白兔公還過于茲道倚徙古祠
空碧水流春澗清猿嘯晚風傳聞駕鸞鶴來往月

明中

宿唐濟武太史志壑堂即事

新竹捎檐夜氣清忽聞山鳥報寒更單衾喚起瀟
湘夢落月已西天未明

寄題采芝山堂

滅迹雲峰裏多年茹紫芝商顏如可作園綺是吾
師危磴雪消處斷崖泉落時何當采三秀從汝結
茅茨

戊辰人日雪行華山下作

吾州最愛華不注白日青天卓虎牙一夜山中三

尺雪曉來失却青蓮花忽雷聞下流漸急華巖宮
前雲霧遮轉憶石帆亭子畔老梅寒竹鬪橫斜

望華不注懷古

老慵便卧輿北風吹龐涼卷簾華不注時來獻青
蒼想像易位處東南畝縱橫齊晉昔更霸往事可
憐傷豈知婦人笑遂召四國殃華泉終古流不見
繫車桑晚投喬木村蠟炬明空堂天低雪欲作四
顧雲茫茫明日渡溪釣早梅應破黃

郡城北路作

齊州南北千峰遶中有明湖一鏡分今日雪中更

竒絕華山雲接鵲山雲

趙北口

莫問公孫事茫茫感逝波晚潮魚簷急夜火蟹簾
多大麓諸流會春風萬乘過年年水楊柳頭白
此關河

歸經鵲華二山間即目

山海作經首鵲山招搖之桂生其間麗麇音凡之水
出其下祝餘四照花爛熳今此鵲山勿乃是越人
陳迹誰追攀灤水南來紆且直羅生夾岸蘅蕪茲
隔水正望華不注疑臨玉鏡窺煙鬢是耶非耶看

不定尹邢雙照蛾眉彎被山璿瑋不收拾黃如蒸
 栗丹砂殷七十二閘遠鈎帶如棋布子交迴環柳
 花滿樹綠於染杏花點地紅斑斑始知今日已寒
 食潑火小雨回天慳濯纓湖亭好煙景春波澹沲
 去清心顏回首却望衛河北風沙莽蕩連雄關

女郎山

卧輿夢初起遙見女郎山雨過開奩鏡煙消露髻
 鬢靈祠空翠裏瑶瑟碧雲間不是崔羅什何因奉
 玉顏

澣山舖

山市依湖岸煙光晝杳冥竹欄看鴨鬪茅屋帶龍
 腥一水兼天白羣峰挾雨青漁舟與沙鳥來去墨
 王亭

嘯園詩十二首

梭山

云是天孫梭何年化空碧蕭條松桂林晻靄幽人
 宅不妨折齒人長茲置巖石

澣溪

澣澣東注海濫觴乃於此一勺出雲根石流湛清
 泚應有遺世人枕流還洗耳

見山亭

張公茂蘭故居正德間京師語曰天下清官張茂蘭

入門不見日風動千竊竊孤亭在竹中猶傳清士

居世無劉伯畊豈慕貂襜褕

張官京師冬無絮衣遺者皆自不受東阿劉田伯畊以衣送之乃

受曰世惟劉伯畊衣可服耳竹中字見左傳海岱清士見世說

長白深處

亦名君子堂

肅然萬壑深結廬最深處昔睹封禪儀今餘采樵

路惟有漢時雲悠悠自來去

長白即封禪書之肅然山

猗玕洞

古潭深不測石梁架岩洞中有蟄龍蟠鱗甲欲飛

動明玕照清流幽禽時一哢

勘書閣

北齊勘書圖流傳子華作

楊子華有勘書圖

髮髯邗魏流劍

珮文林閣從容四庫間何如百城樂

海燕樓

朱樓玳瑁梁春社紅襟燕年年思故巢涎涎會相

見花動倉琅根美人起常晏

橫翠閣

高閣冠清溪雪浪相迴薄簾捲暮山晴衣霑空翠

落煙暝竹林間歸飛雙白鶴

淨友亭

斑竹已解裊翠葢復如雛虛堂受荷氣疎簾漾文漪風標兩公子照影時來窺

據梧山房

茗茗百尺桐孫枝露初引下有怪石供離立衆星隕山月下窺人嘯歌荅虛牝

晚香堂

寒空正搖落衆芳一以息采采黃金花獨藉風霜力把酒東籬旁連山澹秋色

流觴處

次山石魚湖石魚在湖裏一曲滙空明列坐臨流

水風送酒船過鱗鱗數帆起

戲書蒲生聊齋志異卷後

姑妄言之妄聽之豆棚瓜架雨如絲料應厭作人間語愛聽秋墳鬼唱時

將赴

闕拜先祭酒府君新阡寫哀

巳巳十一月初二日

親舍今何在孤兒涕淚深桓碑初下窆宰木未成林無復趨庭日空違誓墓心北風吹急雪千片助露襟

題家書後寄兄禮吉并示兒輩

頻年共飲屠蘇酒此際相望千里餘鄉國近聞三

三十四
日雪平安未達數行書伐薪汲水皆名士竹葉梅花又歲除苦憶小園風物好辛盤早已薦春蔬

題門人查夏重蘆塘放鴨圖四首

橫塘盡日雨濛濛間倚筇簪挂釣筒坐愛琉璃一千頃菱花風急罨鳧翁
鴨母船依湖水濱船頭長日飯龜尊憑誰寄謝栢南郡不是鶩欄教鬪人

鴨頭丸帖種魚經盡日蘆碕泛渺冥何似漁陽隨突騎天風齊放海東青

列仙之儒形甚臞一竿偏愛狎江湖畫師也會幽

人意不作金盆孔雀圖

題門人張力臣寫真二首

瘞鶴銘邊攜屐日羊侯祠下卸帆時吳山楚水探竒徧不覺秋霜點鬢絲

金石遺文太放紛摩挲千卷對鑪薰白頭更訪鴻都學手拓陳倉石鼓文

題蔡方麓宮允寫真二首

沈香火暖護香篝走馬蘭臺露未收曉日花間鈴索動內人催喚撰詞頭

猶記句臚唱第時龍樓初日上罌罍五年不共蓬

三六十八
山直披卷依然玉樹姿

題臧介子舍人濟陰玩月圖卷

三五南華月登臨迴散愁懷人
漆園吏把酒庾公樓水與荷陂
接光連玉露秋吳興未歸客應
憶白蘋洲

憶西城別墅

池北池南半竹枝疎梅照影恰
臨池今年誰作林園主孤負花
明酒釀時

題門人沈客子林屋幽居圖五首

萬頃玻璃不受塵樓居高與太
清鄰紫泉石髓儻

留得我欲因之窮左神

隱几春山似畫屏下窺玉柱接
金庭禹書縱遣靈威守合為幽
人一啓扃

五月楊梅血色斑雲林十里畫
圖間杉皮屋子青苔徑獨占吳
王消夏灣

玉堂酒渴夢江南林屋東西路
舊諳煩汝封題三百顆夜來霜
信到黃柑

漁洋山下是吾家山北山南半
種茶留得繖山方竹杖待君風
雪探梅花

棲霞寺紫峰閣前有方竹一叢予取以作杖方爾止銘之

寄題念東侍郎載酒堂

三三卅
雁門言卷一
十一
蓋頂黃茅野意存
鑑湖一曲古城根
疎梅亞竹臨官路
遠水浮花過縣門
上日抱琴穿略約
何人載酒醉窠尊
春來騎馬東華道
悔不從君學灌園

追和徐東癡釣臺懷古

帝業真歸赤伏符
故人_一不作執金吾
猶嫌齊國知男子
終隱桐江學釣徒
鼎足三公慎要領
師中十載白頭鬚
清風萬古嚴陵瀨
知有雲臺博士無_{范升也}

憶石帆亭寄兒涑汭沂四首

梅花香裏置茅亭
下有蒼筤萬箇青
聞道故園三日雪
與誰同聽玉瓏玲

瓏玲見揚子

磬口檀心世外香
幽姿那點壽陽妝
祇宜霽雪明牕裏
手搦疎花寫硬黃

仙人鸞尾何年墮
池北池南共歲寒
又向東華騎瘦馬
春風先問竹平安

麥顆風爐手自烹
林園急雪夜三更
不知賀若今存否
夢裏琴聲大蟹行

寄盤山拙公

盤山富蘭若近若
一雞飛縛屣林中去
風吹屈朐衣

題趙松雪畫羊

三百羣中見兩頭依然秃筆掃驊騮
竭來清遠吳興地忽憶蒼茫剌勒秋
南渡銅駝猶戀洛西歸玉馬已朝周
牧羝落盡蘇卿節五字河梁萬古愁

庚午新正過朱竹垞太史齋中探春緋桃諸

花盛開賦三絕句

馬騰曾說野人家每先去東皇管物華
今歲長安霜雪少試燈風裏見唐花

十笏如聞功德香曼殊陀利兩芬芳
偶來小坐談空處政要天花作道場

方丈重過亦勝因散花天女正橫陳
上人默坐空

諸相縱遣花飛不著身

過弘衍菴海棠已化去感懷施愚山侍讀昔與

愚山看花賦詩於此

十年不見謝宣城目極澄江遠恨生
白首重吟枯樹賦江潭蕉萃庾蘭成

寄題念東先生松巢

仙人樓居苦偈仄要與老鶴分松風
天籟寒濤萬頃生虛空仙人曲肱睡
正熟馭風倏過扶桑東下視蓬萊玩清淺
太華夜碧聞清鐘

月蝕宿都察院署贈周石公中丞

御史府中烏欲棲滿城車馬驟春泥一星執法中
臺峻五夜嚴更刻漏齊才盡玉川傷顧兔時平越
石厭荒雞與君十載東朝舊燈火曾分太乙藜

余與中丞
同為宮僚

立齋相國齋中蕉花開索賦六首

漢主初開扶荔宮甘蕉花入上林紅今朝獨樂園
中見始信嵇含狀最工
中書退食日蕭蕭簾捲西山爽氣饒茶臼筆牀相
對好一林花放膽瓶蕉
玉宇微涼八月中林塘香散木犀風綠天深處一

花坼蝙蝠飛來相映紅

南中紅蕉花開有紅蝙蝠
蝠集花中見酉陽雜俎

朱萼新抽萬卷書仙人掌露勝醍醐丹青好借黃
筌筆更寫紅蕉水鶴圖

紅霞一抹映瓊杯照影銀塘細細開不似平泉閒
草木猶煩驛騎日南來
木棉千樹粵江邊不及蕉花分外妍常記五羊城
畔見一枝紅壓蠻人船

聞二東春雨霑足喜寄諸子

故鄉冬雪後穀雨一番新園坼竹尊者星明農丈
人縣官初給復田峻屢班春何事東華道朝朝望

麴塵

送謝方山假歸德州

廿載爲郎少宦情
五言真屬謝宣城
人如白雪風流遠
草妒青袍日夜生
飛蓋西園誰故舊
送君南浦又清明
名家韋杜天元近
休壘陽關第四聲

三月十二日拜御史中丞赴暢春園謝

恩作

西山曉翠望觚稜
五載田園倏見徵
右掖一星明執法
南臺六察領中丞
清時袞職將何補
昨夢瀛洲已倦登
霄漢承恩頻忝竊
新銜還是一條冰

戲簡汪鈍翁四絕句

已未作久刪去偶見鈍老刻集載見谷詩因追錄存之

潁水箕山傲昔賢
金庭玉室隔人煙
逃名却被山英笑
兩字堯峰世已傳

談經人比鄭公鄉
絲竹門生列後堂
爲奉侏儒一囊粟
山中閑煞束修羊

陽山山外好煙波
可惜柴門掩薜蘿
莫怪山人高價賣
此中佳處本來多

吳中高士謝山靈
共指文星傍帝廷
今夜堯峰高處望
不知何處少微星

浮梁令介初兄輓詩

諱臨元聊城人順治辛丑進士甲寅殉節贈江西按察司僉事

三三三
傳烽連岳麓羣盜逼杉關抗節冰霜裏捐驅豺虎
閒黃巾何日盡白馬不生還惟有啼鵑血春來返
故山

送徐勝力宮諭典試貴州兼寄田綸霞中丞
百戰曾經馬伏波送君五月下牂牁祠過帝女逢
斑竹洞入秦人訪綠蘿已見華風開瘴癘須令樂
職備中和田郎久別應無恙共倚南樓一嘯歌

五月初七日雨中瀛臺啓事

極目紅欄綠浪兼之細雨斜風一幅吳淞煙雨只
少天隨釣篷

初八日晴入瀛臺再成

日照馭娑宫外風來魚藻池邊沙上水禽偶語橋
頭人柳三眠

董起男送風雨梅戲占爲謝

故友御史
玉虬子

吳中五月梅黃雨想像千林船趁風珍重遺來香
軟齒不須將醋沁曹公

題門人查德尹雲林畫軸二首

平生不作王門客莫把倪迂配米顛最憶推蓬寫
松石菰蒲秋雨熱龍涎

曾上神嵩眺雒陽碧伊清洛迴蒼蒼怪來舒卷煙

三六
雲滿得自盧鴻舊草堂

畫為登封詹學耿先生物德尹遊嵩山往謁撤以為贈云

荅陳元孝寄懷之作

不見閉門陳正字嶺雲江樹五年餘
秋風欲下華陽館粵客纔通尺素書
蒲澗紅泉應不改羅浮翠羽夢全疎
天南耆舊今頭白珍重新詩獨起予

題門人喬無功餉烏圖

烏啞啞引弓射引弓射傷老烏毛
羽拉雜尾畢逋烏生八九子埒茶口
卒瘖端坐桂樹間鷹隼來睢盱精衛
銜木石其志一何愚或言此烏亦非愚
精識動天憫羈孤白日迴光照幽仄一
朝能使烏頭白

題徐藝初寫真

風流好事兼文雅三百年來顧阿瑛
知爾前身是金粟玉山重占草堂名

題周文矩五王避暑圖為李奉倩中丞

聞道開元日宸遊花萼同恩深五王宅

一作帳

勅借九

成宮竹映翠微合泉飛金澗通披圖見隆準
夙矣讓皇風

趙伸符宮贊書來云秋雨霑足山泉四溢臨

流坐石日誦莊騷賦寄三首

名泉秋谷口泉水入門流一夜南溪雨千巖瀑布

三五七五
香屏言卷一
秋雲山初過雁簾閣似浮鷗挂壁松枝塵何人解
獻酬

讀書坐懷古未遣世人知被髮聞鸞嘯彈琴咏雉
噫逍遙羨蒙叟憔悴感湘纍各有清芬在君應自
得師

林居常晏起蒼翠撲晴牕自富五千卷何勞四十
雙采芝綺里季作黍漢陰龐晚節思鄰並還能倒
玉缸

小憩高粱橋

昔日高粱道綺羅嬌上春依然挑菜渚不見采蘭

人新水生魚纈輕絲漾麴塵不妨成漫興青草正
如茵

赴暢春園起居再過高粱橋

被襖來春暮軒車復此過西風一蕭瑟秋水正微
波黃屋雲中近青山苑外多今朝封事暇聊自
飲亡何

送金會公太史歸廣濟兼寄開先顥公二首

破額山前水依然碧玉流吾廬真可愛此外復何
求名已高三館歸還讀九丘蘋花何處采遙送木
蘭舟

廬岳天邊影千峰恰對門舊遊時入夢君到必窮
源雪後康王谷花時陶令村遠公相憶處共聽一
聲猿

喜彭羨門閣學卜鄰之作

少小論交三十載中間離合似浮雲谷風莫問窮
兼達舊雨猶存我共君東閣從容多密劄南臺潦
倒恕彈文望衡乍喜相鄰並可許談詩坐夜分

寄懷尤悔菴太史四首

歸田身更健重築遂初堂宋尤文簡公堂名悔菴始祖也名預耆英會
心空選佛場卷簾看鄧尉倚杖濯滄浪畫作屏風

樣何妨遠寄將

白詩云便是屏風樣又云兼聞好事者畫我作屏風

令子初休沐趨庭樂事多書名王大令詩格小東
坡真誥通仙籍名經禮佛陀銅坑梅信早定擬百
回過

何必買山隱翛然居士家華亭丹頂鶴甫里白蓮
花船遞中泠水僧分顧渚茶筆牀將釣具隨意泊
汀沙

早歲已研京新羅識姓名老如袁伯業鄉即鄭康
成束筍文千軸秋霜髮數莖高堂吹笛罷教授幾
門生

為彭訪濂侍講題尊公雲客讀書圖

別君三十載把臂此圖中自著潛夫論人傳河上
公依稀逢墮履髣髴見方瞳欲問華陽館松聲日

暮空

先生信道甚篤余與定交在癸巳年

題姜西溟洞庭秋望圖

君家剡溪西為復剡溪東王謝昔居剡千秋緬遺
蹤我往欲就君名山懷剡中幾載京國遊素心王
謝同君忽泛五湖仙壇訪毛公徑披笠澤雲蓑笠
青濛濛萬頃白銀灣倒浸七十峰拂袖縹緲巔五
州羅心胷脚踏巨鼇背目送孤飛鴻人言秋興逸

况臨水精宮湖霜熟黃甘林煙染丹楓落日迴漁
舟蘆中收釣筒欲呼天隨子兼挾鴟夷翁茲遊信
清曠愧我羈樊籠他年剡溪歸相期喚樵風

帶經堂集卷五十三

三子四
壺中九華那足擬，仇池枉用誇。顛蘇三茅地，肺互
鉤帶二華雲。氣相縈紆蛟龍屈，蟠待雷雨仙靈鬣。
鬣迴駟車華蓋一峰獨，秀拔宛插玉笏翹。犀株翠
巒玉筍左右列，睢尻股脚相敲扶。上洞下洞閔曲
折，潛通小有涵空虛。龍池幽窈驗兩候，頗疑中有
驪龍珠峰獨。者蜀屬者嶧，上泉有埒下有瀟。座客
摩抄三歎息，蒼然古色生眉鬚。海嶽之菴書畫舫
幾伴此老浮，江湖巧偷豪奪歷千劫。閱盡春秋如
螻蛄，翰林好事過顛米。日餐蛾綠忘飢飭，滄江夜
夜虹貫月。莫令光怪驚菰蘆。

再題研山絕句示竹垞

南唐寶石劫灰餘，長與幽人伴著書。青峭數峰無

恙在不須淚滴玉蟾蜍

元章詩研山不可見哦詩徒歎息惟有玉蟾蜍向余頻淚滴青峭數峰南唐元宗語

題李梅崖僉事讀書處

幽花覆徑竹捎檐，讀易先生晝下簾。鶴柴曉開苔
面破，魚苗春漲水痕添。胸中磊落五千字，架上縱
橫三萬籤。黃鶴山邊戴顛宅，鄉心猶繞數峰尖。

得門人隕陽守衛凡夫書却寄

曲沃文清公子

鄭國煩才子，青春擁傳車。沔江帶城郭，參岳到庭
除。京兆三年別，沱潛一紙書。相門清白後，無忝謝

羅居
 僻郡凋殘甚遺聞昔有徵漢歌留上堵唐蹟在房
 陵讀史應懷古憂民獨撫膺爾書二千石早晚看
 飛騰

門人朱悔人入都即往天津寄懷

秋色重陽晚寒空木葉聞相逢何草草別思已紛
 紛海氣津門雨鴻聲楚澤雲誰憐棄繻者猶是舊
 終軍

題河梁圖送門人俞蒼文歸雲間

秋氣晚冥冥歸帆挂潞亭五茸紅葉樹三泖白蘋

汀去路日已遠流波無暫停西山如送客不改舊
 時青

題門人魏禹平水村圖四首

天邊如黛九峰青一曲分湖望渺冥賸客不來苔
 滿徑日修蟹志補魚經

水紅花發一叢叢翡翠雙飛西復東好與吳興鬪
 清遠道人合住水晶宮

草閣前臨大小泗銀絲鱸縷助行杯偶然小試垂
 竿手正得鱸魚四十枚

寫得江南水竹村煙波萬疊護柴門又魚射鴨閒

家具我亦思歸夢陸渾

題朱竹垞雪景寫真四首

天女長空散六花疎枝冷蕊鬪橫斜小身幻出維摩影費我連朝玉畫叉

雪後谿山畫不如梅花林外跨青驢相逢莫笑酸寒甚曾較華林七錄書

雪屋寒林斷晚煙板橋流水尚濺濺不逢才子安鴻漸定是襄陽孟浩然

風急天山雪打圍下鞦鷹疾掠空飛誰知驢背江南客手拗寒香插帽歸

題竹垞小長蘆圖卷三首

史筆高三館歸心戀五湖分明鰕菜好寫出小長蘆

膝上佳兒文度眼中秋色江村歸路不須扶杖笑

凭桐孫稻孫太史二孫名

一蓑一笠日相隨不似官人似釣師七字愛吟楊處士亂堆漁舍晚晴時

十一月二十八日雪懷天章伸符

趙生梁甫北吳子中條陰兩地懷人遠連朝積雪深黃河遶蒲坂紅葉滿荆岑欲鼓幽蘭曲何人是

賞音

雪中再寄伸符宮贊二絕句

遙指天孫碧落東北來
山色雪空濛美人家在峨眉嶺
一片空青海綠中

雪滿西山玉不如
捲簾萬笏到堦除
兔園賓客今餘幾
起對梅花欲寄書

家書至知女端於十月初九日已葬哭之五

首

明明橫磨劍割我父女恩
遙持萬古淚送汝青楓根

左家嬌女詩陳王金瓠辭忘情非太上萬古一銜

悲

此詩成頗自疑癸酉秋女宮又卒殆識云

芫花已半落松風還夕清
系河南去路從此隔幽

明

京洛逢初雪花如柳絮飛
謝庭無道韞腸斷向寒

暉

滄海明珠失驚風蕙草枯
系河一曲水應喚女墳

湖

謝盤山拙公惠芝

寄我靈芝車馬形萬年松下斲
青冥菟絲聞道垂

千尺更欲從師乞茯苓

送方位齋出守登州

齊煙青九點東北盡之罘雪霽辭燕市天晴見蜃樓風流今玉局貢錯古東牟定上蓬萊閣忘機下海鷗

再荅拙菴禪師惠芝

寄書已十載見面亦何遲忽有山中信來當歲暮時欲尋清淨退更訪人天師不遇商顏叟何因茹紫芝

冬日出部署戲作

西樞慚愧握兵符五十形容壯歲徂殘雪一簾牕

日晚姬人學鑷白髭鬚

兵部督捕署在西故稱西樞

戲作示內

追錄順治丙申舊作

少年潦倒一愁無今日朱顏攬鏡殊解說羅敷夫

婿好鬢髮何似使君鬚

六朝人謂蘊藉為潦倒

冬杪門人李蒼存送盆花奉荅

雪後唐花取次開憶君獨酌盡深杯雨花小劫忽
忽過好問文殊師利來

較盤山志竟寄拙菴禪師

選佛場非遠青溝講席開常言行脚去何日打包

來彌勒同龕處英雄舞劍臺
薊門春樹裏東望興

悠哉

盤山有李衛公舞劍臺

題羨門閣學采藥圖

秦駐山中采藥歸
銀魚挂壁夢依稀
羨君攜得驂鸞侶
霧鬢風鬟木葉衣

招梅定九并題寫真

梅精律曆著中西算學通

齊人漫說談天衍
漢代虛傳洛下閎
欲向百泉聞絕學
小車花下待先生

奉

命典會試二月初六日
賜宴禮部

郎官列宿記當年
重到南宮尺五天
滿座金貂霄漢上
幾叢羅綺舞筵前
八公相鶴希真賞
一代登龍愧昔賢
弱歲計偕今白首
承恩還憶舊青氊

闈中作

一半青春在鎖闈
韶華客思兩依依
燕知社日逡巡到
花滿春城歷亂飛
敢謂進賢蒙上賞
只思沽酒解朝衣
檐牙曉日聞靈鵲
檢點宮花御苑歸

放榜

銀燭青煙徹
曉明曙鴉聲散九重城
高風鷗鷺扶搖起
春水魚龍變化生
仙掌凌空干氣象
湘靈鼓

瑟擅才名書生報國從今始取次煙霄第一程
辛未榜後荅梅耦長見投

東坡與方叔千古為咨嗟如何古戰場亦復失李
華絕足不見知終使困鹽車東風朝夕來愁見長
安花

題李叔則寫真

腰腹驚看似伯仁鬚眉彷彿見河濱寄言江左夷
吾輩定可容渠數百人

送張寶菴宰新野

牽絲雖百里湯沐古南陽白水清官舍青山落印

牀人祠銅馬帝城倚卧龍岡遙憶絃歌處風流楚
塞長

送門人李伯含郎中出守都勻六韻

作郡向炎方雲山古夜郎三苗殊漢俗五尺啓秦
疆銅鼓祠諸葛蘆笙賽竹王薈菲開瘴雨蕙苾綴
蠻粧掉尾多盧鹿編忙半紫姜文翁能化蜀不用
薄淮陽

聞越王臺重建七層樓寄陳元孝屈翁山梁

藥亭

昔登粵臺上不見七層樓空憶扶胥外南溟天盡

頭憑虛起飛觀流目極炎州安得凌風翼真同汗
漫遊

送劉君宰建德

送者自崖返君真建德遊桐廬最蕭灑水木況清
秋橘柚紛千樹漁商聚一州新安江見底應憶古
羊裘

送侯介藩宰興安

秋渡三湘水春遊八桂林驂鸞徵古蹟迴鴈寄鄉
心乳洞應無恙石湖有興安乳洞三巖詩陶碑想陸沈山谷有陶商翁碑在興安
來紅豆蔻花滿訟庭陰

出塞

紫塞鑾輿度黃旂輦路開名王紛玉帛 天步動
風雷日逐稱藩入呼韓稽顙來軍中朱鷺曲聲震
白龍堆

首

保和殿大學士兵部尚書蒼巖梁公輓詞四

當宁咨元老儒林仰大賢晚聞司馬相未及潞公
年東觀留餘論公嗜書畫古器鑒別最精南陽表賜阡平生商出處

端藉史臣傳

儒雅開文苑風流亦我師豈知台象坼真兆哲人

萎蕉葉銀鉤字棠村錦瑟詞 蕉林棠村皆公所居 平泉多
草木金粟但餘碑

大農持節日萬里昔曾經忠信開蠻瘴安危繫使
星越人罷黃屋漢德播滄溟銅柱今無恙他時好

勒銘

遲暮開黃閣孤卿閱黑頭文章忠獻後 韓忠獻云某為
相永叔為學士

天下文章莫大乎是 風度曲江儔道大消朋黨歸全絕悔尤雕

丘杏花坼何路哭西州

荅拙老寄盤山圖

三生支許最相關未得相尋水石間應笑羸提舊

居士祇從圖畫說盤山

題汪孝子子喻寫真

一望愁雲壟上低年年社日草萋萋谷中宰木知

何限夜夜慈烏繞樹啼

太子太傅文華殿大學士刑部尚書謚文毅

易齋馮公輓詞

斟酌調元氣從容秉化鈞青山休沐日黃髮老成

人祖帳 君恩重綸扉直道伸 公在政府屢有直
言深蒙 嘉納 易名真

不忝碑版照麒麟

東門人陳藹公於昊天寺

重來依老衲蘭若倚西城白日一何速青山無世
情冢中王輔嗣林下古先生好共蟬連語寧論世

上名

昔同愚山侍讀奉訪於此已
十三年寺旁多古冢故戲及

十月朔 親祭 太廟是夜雪

丞嘗崇 九廟雲物麗層霄 三后神靈遠中天

陟降遙 至尊思肸鬻列侍肅金貂六出豐年喜

先迎 御仗飄

初三日
小雪

棟亭詩曹工部索賦

孤亭思舊德歲歲棟花風澆用千牛乳來從五柞
宮甘棠終憶召大樹尚留馮手澤勞封殖無忘賦

角弓

送門人陸次公判撫州兼寄牧仲中丞

青門一尊酒言祖謝臨川人憶貝丘別鴈隨彭蠡
船高齋逢霽雪春思入江煙為向中丞問吟髭白
幾年

退朝雪中懷拙菴禪師

東望盤山三百里年年結束負行旃偶逢金水橋
頭雪忽憶梅花樹下僧鉢裏伊蒲常施鳥巖中瀑
布幾成冰丈夫一事公無讓未許尋常將相能

唐崔

趙公問徑山道欽禪師弟子出家得否欽曰
出家乃大丈夫事非將相之所能為崔有省

過梁家園憶宋荔裳按察昔邀梁蒼巖龔芝
麓二先生與予兄弟汎舟於此頗有唱和
時諸公及先兄西樵皆歿
此地足煙水當年幾溯游故人皆宿草衰柳又驚
秋門冷鼯鼯竄霜寒鴈鷺愁永懷川上歎逝者竟
悠悠

題梅爾止太僕洗桐圖因贈

卜築昭亭山下居山中風物近何如歌成朱汗徠
天馬夢憶琴溪跨鯉魚東觀至今留諫草北樓他
日問藏書雲林清閼應無恙坐對孤桐百尺餘

題畫龍虎同官兵部侍郎席珠公索賦二首

神龍穿山張鬣鬚煙霧出沒鱗之而奔騰四海水
皆立黯澹九天雲下垂何人妙筆追董羽雷車砰
訇震天鼓飛廉屏翳紛後先直上長空作霖雨
空林白日風怒號千崖落木如驚濤於菟據地正
憑怒青兕黃熊皆遁逃太平有道麟在藪玉虎般
般樂君囿空山藜藿歸去來不避豪賢亦何有

聞滕王閣落成寄宋二牧仲開府

中丞持節鎮洪州滕閣重開勝庾樓清簟疎簾過
暮雨隱囊紗帽對江鷗曾來弭棹悲殘劫虛擬題

詩到上頭安得乘風度彭蠡與君吹笛坐滄洲予乙丑滿

南昌閣
燬於火

柳

雨態煙姿定有無柔條依舊暗金鋪風情合讓鍾
山隱手寫黃羅付慶奴

遙題牧仲煙江疊嶂堂堂在北蘭寺

東湖勝事擬西湖幻出煙江疊嶂圖也似東坡在
龍井不知曾有辨才無

題王石谷畫送竹垞歸禾中二首

漁浦樵風望欲無煙波一幅小長蘆明年禹穴添

奇事更寫名山入剡圖

西清載筆十三年清切長依尺五天回首玉堂春

夢醒何妨有錄續歸田

題李貞孟少司空寫真二首

纔聞歸院撤金蓮又見臺烏報夕遷上殿自關天

下計朝來封事萬人傳

梁苑風流雅不羣侍郎彩筆更能軍早聞唱第蓬

萊殿日下驚看五色雲

韓忠獻公唱名第二太史奏
五色雲見先生名第適如之

送門人高念祖遊大名宋烈武王
瓊之裔

澶淵懷古處猶識衛王功將相同心日華戎一氣

中衣冠南渡遠鎖鑰北門雄祖德君能述茗茗繼

謝公

相謂寇忠愍公

題張敦復大宗伯賜金園圖

我昔曾過龍眠山山雪蒼茫歲方晏龍眠山莊知

有無空向圖中幾回見遺墟但指璇源館

在舒城亦伯時別業

芒屨未踏垂雲泝見樂城集祇今彈指越七載過眼流光

等飛電龍眠尚書早致身玉斧森沈侍清燕承

恩暫許休沐歸朱提賜出蓬萊殿鑑湖一曲落公

手草木雲嵐荷深眷數問家金供賓客遺事蘭陵

何足羨三年却返承明廬夢寐家山寫東絹溪流

百曲學印文山色千層累重甌龍公鸞尾嘯煙雨

鹿角鼠鬚飽霜霰哈呀忽斷漁浦開仰見雲中瀉

飛練草堂抱膝還讀書樂此長年可忘倦此山此

圖世稀有終擬他年追勝踐待公功成歸故山江

帆特乞樵風便

送姚綏仲編修歸省因寄羹湖二首

歲晚龍眠路曾過竹葉亭簞簞千箇綠苔蘚一簾

青韋氏傳經學荀家有聚星因君煩問訊計日慰

趨庭

再憶城南飲籃輿到泳園梅花橫石礧風雪啓衡

門妙畫樽前作新詩燭下論玉河折楊柳逸興已

飛翻甲子冬奉使東粵過桐城羹湖欲留余竹葉亭度歲不果作畫賦詩相送泳園羹湖別業在南郭山上

寄題齊河王氏園

清濟來王屋東流遶祝阿閑園傍隈隩曲徑隱煙蘿野曠山容合亭空水事多當年會盟地今日有漁蓑

送同官人岳大司農賑關中

鶉首神臯古雍州年來雲漢塵宸旒輓輸西溱襄陽道襄宛陸運河漕南通底柱流江淮水運三輔耕耘看漸復二陵風雨莫深憂司農持節臨關內早為蒼生借

一籌

和趙伸符宮贊寄門人洪昉思絕句趙詩云垂堂高坐本難安

身外鴻毛擲一官獨抱焦桐俯流水哀音還為董庭蘭

七條絲裏賞音難自拭龍脣玉軫寒君是開元房太尉一生留得董庭蘭

門人汪于鼎寄始信峰草堂志

避地何方好天邊始信峰人歸散花塢徑度擾龍松向下雲煙積當門澗壑重此中猿鳥絕無路識行蹤

送吳商志之大梁二首

夢華何處是髮髯舊東京蜀洛人誰在登臨自不
平堂曾傳萼綠壘尚指青城流恨金明水春波日
夜生

金梁橋上望依舊月如霜法曲傳宮伎流風說憲
王中原飽戎馬世事幾滄桑且可酣醇酒忘情錦
瑟旁

題門人袁士旦寫真

一童子
捧劍侍

寶劍千金直平生一諾存曾過朱衣市屢入信陵
門末俗多遊俠窮途尚報恩試聽石城曲家世本
諸袁

烏目山人歌贈王石谷

翬

我聞慧車子昔居烏目山淳于從之受虹景一朝
拂袖升天關仙蹤宵渺幾千載惟見烏目山色高
孱顏烏目山人有仙骨早年嘯傲煙霞窟白頭不
識豪貴門林卧蕭然謝巾襪有時潑墨何淋漓人
道前身應畫師胸中五嶽起方寸落筆萬象爭神
竒寸縑尺素走荒裔江神欲奪蛟龍知疑君古人
乃並世昨來忽貽十幅無聲詩或仿營丘或洪谷
或摹黃鶴或大癡偶與吳興鬪清遠白蘋碧浪迴
煙姿深黃淺絳妙點綴吳筆項墨窮毫釐更聞應

詔大同殿 重瞳一顧親嗟咨菰蘆中人乃有此
何不高議金華為君言掉頭且歸去尚湖秋老羹
蓴絲山中仙人待已久怪我遊戲還山遲他日相
思訪烏目慧車有約同遨嬉

題崇福寺壁

陳孺人權厝此寺

淚盡縷金衣流連掩總幃但留奩具在無復佩環
歸一徑空花落雙林忍草稀中宵仙梵寂形影是
耶非

得同年張蔚生郡丞書

美人佐郡古涼州書札緘題慰四愁宛馬如雲頻

入塞玉關何日罷防秋唐家都護安西府漢史功
名博望侯幕下即聞多薦達叅軍未必久淹留

石谷與門人合寫西堂詩思見贈題其上

谿流過雨泱泱鳴天風環珮來琮琤谿邊山色自
太古嶺上白雲非世情疎簾清簟晝無暑翠竹碧
梧時有聲此中幽意少人會起坐彈琴山月明

題焚琴煮鶴圖

丹頂青田鶴朱絲綠綺琴希聲傳靜夜清唳警疎
林忍付庖丁手寧論爨下音惟將廣陵散一弔九
臯禽

送楚雲禪師歸棲霞 將赴江西 壽昌之請

優曇纔一現飛錫遠人間又向紅泉去何時白下
還家風傳洞上詩句似寒山寄語明僧紹多年約

閉關 子遊攝山 三十年矣

為門人王令詒題松南柳磯圖二首

西風圓柳薦新涼黃柳稀疎鴈帶霜開卷相看似
相識釣魚船上謝三郎

楊柳依依水四圍垂竿不為鱖魚肥蟹船萬里扶

南水回首松南舊釣磯 時赴粵東 茂名令

悼亡詩十二首 哭陳孺人 及女宮作

優鉢曇花現即空那堪搖落委殘紅招魂欲問魂
何處冷雨淒風野寺中

十七年來憶別家任城雲樹即天涯接藍一道南
池水爭忍重歌陌上花

乘願無姻莫斷腸相從浩劫禮空王三生補塔因
緣在知是金光是飲光

秋社經年燕燕歸今年春社事全非後堂寂寂簾
垂地何處紅襟上下飛 今年梁 燕不至

博山香篆倚銀屏三體唐詩梵字經髮髻紅牕人
未寢燈前教誦雨淋鈴 孺人修梵行又喜唐絕句予口授百首皆 成誦雨淋鈴夜却歸秦一篇所常諷詠也

銀箭金壺聽麗譙年年空負可憐宵
拋殘斗帳紅蕤枕手點茶湯候早朝
枕壓偏鬟久罷梳綠牕晝寂掩流蘇
那堪亭午朝回後日聽垂簾響藥鑪
耿耿銀河夜有霜玉堦露草覆寒螿
橋南荀令無情思堅坐空庭爲取涼
荀奉倩事見世說
新粧不愛桃蘇髻半臂全無柿蒂綾
祇有桓家荆布在一回瞥見一沾膺
花謝東風月墮雲蘅蕪香歇幾時聞
縱然月沒教星替何許相逢李少君

十齡嬌女伴泉臺猶記啼聲繡祿催
今日斜陽蕭寺裏西風吹送紙錢財
阿宮附曆僧舍
濃香銷歇掩空幃刺有羅巾印口脂
只似雲車還入洛魚山深鎖智瓊祠

文華殿大學士吏部尚書謚文襄鄴園李公
輓詞四首

烽傳閩嶠日屨及寢門時四海方多壘
三衢首誓師令嚴司馬法人覩漢官儀
忠義平生志皇天后土知
結用李薦祭蘇文忠公語
書生矜燕頷萬里取通侯列戍紛江介
諸軍望節

樓挽彊朝射虎饗士夜推牛莫訝頭須白功名百戰收

曳履上星辰中樞及統均勲庸釐秬鬯圖畫照麒麟淮蔡饒歌入元和雅樂新沙堤聞築處開閣佇功臣

角巾東第去一棹直沽風絲竹隨安石林園待潞公神騎箕尾立望與斗杓同家世西平舊重論社稷功

題牧仲中丞述鹿軒詩卷二首

七十二峰充下陳漁洋一點具區濱胸吞雲夢君

何有却對漁洋憶故人

中丞有望漁洋見懷之作

燕寢凝香畫戟枝放衙花底鶴相隨愛君五字風

流甚實有文章替左司

白樂天詩敢有文章替左司

寄荅余澹心

甲子使粵澹心附子及鄭山公司寇南行

江東耆舊盡無恙浣花翁龍腹名誰及蛾眉老愈工瀛滄千里道風雪一樽同書帶今零落翻令憶

鄭公

吾鄉鬻山有司寇書帶草時鄭公新歿

甲戌除夕前二日雪集姜西溟吳商志門人

蔣京少查夏重宋山言周策銘殷彥來分

賦得錢思公

雪下度輾轅煙中望伊水逶迤林壑間皓然見千里車馬渡水來云傳府公旨駛雪宜山行小住爲佳耳迴眺二室雲蒼茫半空裏俯聆八節灘潺湲漱寒齒丞相解憐才洛中盛文士風流映古今千載猶興起

五月望日京少山言彥來靜山邀過崇效寺訪雪塢法師看棗花同賦

祇園棗花時招攜共遊散髣髴旃檀林吹香綠陰滿射覆叱來來樂府歌纂纂樂此愴忘歸林中夕陽緩

王謝居東日頗愛支道林亦有鴈門僧宗雷共招尋我來空寂舍一契山水心復有二三子清言滌煩襟遞捉玉麈柄流憩青松陰何必嵯縣遊而憶廬山岑

題將樂令芄生錢公殉難錄後

玉華山水窟僊令有遺祠羣盜憑城日孤臣授命時平生酬馬革英爽颯雲旗峴首千秋石應刊第
二碑

帶經堂集卷五十四

王華山木窗對今有畫同羣益愚知日係到對命

賦深樂令其主廷公既韓給對

畫山岑

賦蘇飛對王壘林流賦青林卸向必來綠我而對

長塔來空室對舍一英山水心對有二三子青言新

王機對東日賦愛支直林亦有飄門曾宗雷共對

淚
架四

